



14. september 2010

Inatsisartut suleriaasianni § 36 imm. 1 naapertorlugu Naalakkersuisunut apeqqutit imaattut matumuuna saqqummiuppara:

Nutaarsiassat aqqutigalugit Royal Greenland-ip Pisortaasa marluk tunuarnerminnik nalunaaruteqarnerat aallaavigalugu ima Naalakkersuisunut apeqquteqassaagut:

- 1. Nunatta karsianiit Royal Greenland-ip aningaasaliivigineqaqqinnissaa ilimanaateqarpa?**
- 2. Naalakkersuisut siulittaasuata upernaakkut 2010 Inatsisartut ataatsimiinnerisa naalaanni inatsisartunut Royal Greenland pillugu misissuinissamik suliakkiinissaq pillugu neriorsuutaa sumut killippa?**

(Inatsisartunut ilaasortat Per Berthelsen, Finn Karlsen, SIUMUT)

Tunggavilersuut:

Ulluni kingullerni tupaallannartumik Royal Greenland A/S'imiit nutaarsiassatut saqqummerpoq nalunaarutigineqarluni suliffeqarfissuarmi atorfinni qaffasinnerpaani inissisimasut marluk atorfirminnit soraarniuteqarlutik nalunaaruteqarsimasut.

Takornartaanngilaq taamannak pisoqartarnera suliffeqarfissuarni annertuumik ajornartorsiorfiusuni.

RG nunarput tamakkerlugu aningaasaqarnermut ima pingaaruteqartigaaq, Siumumiit illersorumi-naatsillugu nipaarulluta taama pisoqarnera isiginnaaginnassallugu.

Taamaattumik Siumumiit pumasaraarput suliffeqarfissuup inissisimanera pillugu qaammarsaataasinnaasumik nassuiaasoqarnissaa

Saaffiginnissutip tuaviortuunera peqqutigalugu sukumiinerusumik suliffeqarfissuaq pillugu apeqquteqassanngilagut, nalunaarutigereersinnaavarpulli Siumut sinnerlugu Inatsisartut Aningaasaqar-neq pillugu Ataatsimiititaliaanni ilaasortatut aqagu ataatsimiinnissami, Ataatsimiititaliaq qinnuiginiaratsigu sukumiinerusunik apeqquteqaateqaqqullugu immaqaluunniit Naalakkersuisut ataatsimeeqatiseriniarlugit aggersaanissaq qinnuigissagatsigu, suliffeqarfissuaq Royal Greenland pillugu.



Ukununnga:

Inatsisartunut ilaasortaq Per Berthelsen aamma

Inatsisartunut ilaasortaq Finn Karlsen

c/o Inatsisartut Allattoqarfiat

Royal Greenland A/S pillugu § 36, imm. 1, apeqqummut nr. 2010-166-mut akissut

27. september 2010
Sagsnr. 2010-038030
Dok. Nr. 459909

Inatsisartut Suleriaasianni § 36, imm. 1 naapertorlugu, Royal Greenland A/S-mut tungatillugu Inatsisartunut ilaasortanit Per Berthelsenimit aamma Finn Karlsenimit apequtit makku Naalakkersuisunit tiguneqarput. Matumuuna apeqqutigineqartut Naalakkersuisut akissuteqarfigissavaat.

Postboks 1015
3900 Nuuk
Tlf. (+299) 34 50 00
Fax (+299) 32 50 02
E-mail: govsec@nanoq.gl
www.nanoq.gl

Apeqqutit:

1. Suliffeqarfik Landskarsimit aningaasanik tapiiffigineqaqqinnissaminut pisiaqartitsileqqissinnaava?
2. Inatsisartut 2010-mi upernaakkut ataatsimiinneranni Royal Greenland A/S-p misissuiffigineqarnissaanik Naalakkersuisut Siulittaasuata neriorsuutigisaa sumut killippa?

1-mut

Royal Greenland A/S-p ukiut kingullit ingerlaneranni aningaasaqarnikkut inissisimanagera taassumalu kingunerisaanik amigartooruteqarnera pissutigalugit annertuumik isumaku-luutigineqartarpoq.

Ingerlatseqatigiiffiup amigartooruteqarnera tunuliaqutaralugu aamma ingerlatseqatigiiffiup Kalaallit Nunaanni aningaasaqarnermut pingaaruteqarnera pissutigalugu, ingerlatseqatigiiffiup aningaasatigut ingerlatsinerata malinnaaffigeqqissaarnissaa Naalakkersuisunit pingaartinneqarluinnarpoq.

Ukiumi naatsorsuuteqarfiusumi 2007/08-mi ingerlatseqatigiiffik 78 mio. koruuninik amigartooruteqarpoq. Ukiup naatsorsuuteqarfiusup tulliani, 2008/09-mi, ingerlatseqatigiiffiup aningaasaqarnera aningaasaqarnikkut ajornartorsiulernerup kingunerisaanik suli ajorse-riaqqippoq, paasinarsivorlu ingerlatseqatigiiffik annaanniarlugu iliuuseqartoqartariaqar-toq. Tassunga atatillugu Namminersorlutik Oqartussat ilisimaneqartutut Royal Green-land A/S-imut 250 mio. koruuninik taarsigassarsisitsippat 250 mio. koruuninillu aningaa-saliissuteqarlutik. Tamatumuuna ingerlatseqatigiiffiup ukiuni tulliuuttuni aningaasaqar-nermigut ingerlaqqissinnaalernissaa iluarsiniarlugu.

Aningaasaliissuteqarnermut atatillugu ingerlatseqatigiiffiup qanoq imminut akilersinnaa-sunngornissaa qanorlu niuernikkut ingerlallualernissaa pillugit ukiunut tallimanut pilersaarusiortoqarpoq. Pilersaarutip imarivai pisariillisaarinissamut ingerlalluaqqilernissa-mullu ukiunut tulliuuttunut siunnersuutit. Pilersaarut malillugu ingerlatseqatigiiffiup ukiumi naatsorsuiffiusumi 2009/10-mi amigartooruteqarani sinneqartoqararlanilu angusaqar-

nissaq anguniartussaavaa, tamanna ukiumut naatsorsuiffiusumut 2008/09-mut naleq-qullugu 196 mio. koruunik pitsanngoriaataassaaq.

Ukiumut naatsorsuiffiusumut ingerlasumut tunngatillugu ukiup affaanut nalunaarusiami Naalakkersuisut paasivaat ingerlatseqatigiiffik 57 mio. koruunik amigartooruteqartoq. Taamaattorli tamanna amigartooruteqarneq ukiup ingerlanerani sulianik allanngorartooqartarnera pissutigalugu ukiup naatsorsuuteqarfiusup affaanut siullermut sanilliullugu, ukiup affaata kingulliup amerlanertigut pitsanngoriaateqarluni isertitaqarfiusarnera neruunaateqarneranik isumalluarfiuvoq. Ukiup affaanut nalunaarusiap saqqummiunneqarnerani ingerlatseqatigiiffiup suli ukiumut naatsorsuiffiusumut tamarmiusumut pilersaarutaasutut amigartooruteqarani sinneqartooruteqaranilu angusaqarnissani naatsorsuutigaa.

Ukiup sisamararterutaasa pingajuata kingornatigut Naalakkersuisut ilisimatinneqarput ukiup pingajorarterutaa taanna ilimagineqartutut sinneqartooruteqarfiusoq, sulilu naatsorsuutigineqartoq ukiup naatsorsuiffiusup sisamararterutaasa kingullersaat sinneqartoorfiujumaartoq. Taamaattorli ukiumut naatsorsuiffiusumut tamarmiusumut amigartooruteqarani sinneqartooruteqaranilu ingerlatseqatigiiffiup angusaqarnissaa ilimagineqarunnaarpoq kisiannili ingerlatseqatigiiffiup amigartooruteqalaarnissaa ilimagineqarluni. Ataatsimulli isigalugu tamanna ukiumut kingullermut naleqqiullugu milliuunik pingasunik kisitsisitalinnik siuariarnerussaaq.

Ukiumi naatsorsuiffiusumi maanna ingerlasumi angusaagallartut takutippaat ingerlatseqatigiiffimmut aningaasaliissuteqarnissaa pisariaqassanngitsoq. Ineriartorneq 2009-mi aningaasaliissuteqarnerup kingorna ajunngitsumik ingerlavoq.

Naalakkersuisut naliliipput ingerlatseqatigiiffiup pilersaarutitut isumaqatigiissutaasoq malissappagu, piffissaq ungasinnerusoq isigalugu Royal Greenland A/S ingerlatseqatigiiffik ingerlalluartunngoqqilluni imminullu akilersinnaasunngoqqissasoq.

2-mut

Isumaqarnarpoq UPA 2010/58 –imut "Royal Greenland A/S tamakkiisumik ilaannakortumilluunniit namminersortunut ingerlatassanngortinneqassappat pitsaaqutit pitsaanngequtillu pillugit Inatsisartut ukiamut ataatsimiinnissaannut nassuiaammik Naalakkersuisut saqqummiusseqqullugit peqquneqarnissaannik Inatsisartut aalajangiiffigisassattut siunnersuut" innersuussutaasoq.

UPA 2010/58-mut akissuteqaammi 15. apriliimeersumi inassutigineqarpoq siunnersuut itigartinneqassasoq. Inatsisartut innassutigineqartoq malippaat siunnersuullu itigartillugu.

Akissuteqaammili Naalakkersuisut neriorsuipput, nassuiaat allanut tusarliuteqqusaanngitsoq Aningaasaqarnermut ataatsimiititaliamut matoqqasumik oqaluuserisassanngorlugu nassiunneqassasoq.

Oqaluuserisassap UPA 2010/58-ip Inatsisartuni suliarineqarnerata nalaani aningaasaqarnermut ataatsimiititaliaq nassuiaat pillugu ilisimatinneqareersimavoq. Tamanna pivooq Royal Greenland A/S-p 8. marts 2010-mi Aningaasaqarnermut ataatsimiititaliamut "Sulifeqarfissuup Royal Greenland-ip siunissami piginnittoqarnikkut nutaamik aqqissuunne-

qarnissaa pillugu nassuiaat” saqqummiummagu. Nassuiaat taanna sulii atuummat Naalakkersuisut iliuuseqaqqinnissamik pisariaqartsitsisorinninngillat.

Aammattaaq Naalakkersuisut 2009-mi Royal Greenland A/S-imi pissutsit pillugit sulia ingerlasimaneranik Naalakkersuisuusimasut suliarinnissimanerat pillugu nassuiaat sulia-rereerpaat, taamatuttaaq taamanikkut Aalisarnermut, Piniarnermut Nunalerinermullu Naalakkersuisuusimasumut ilisimatitsissut. Nassuiaat taanna Inatsisartut ilaasortaannut ulloq 2. juni 2010-mi agguanneqarpoq.

Inussiarnersumik inuulluaqqusillunga


Kuupik Kleist